

古今事物考


一





古 今 事 物 考

(一)



王 三 聘 輯

古今事物考卷之一

監屋 王三聘 輯

天文

〔天〕朱子曰邵子皇極經世書以元統會以會統運以運統世三十年爲一世十二世爲一運三十運爲一會十二會爲一元一萬八百年爲一會初間一萬八百年至子而天始開。

〔日月〕唐孔氏曰積陽之熱氣生火火氣之精者爲日說卦曰坎爲水爲月月之精也淮南子曰日中水有踐烏謂三足烏也論衡曰烏日氣也酉陽雜俎曰佛氏言日中所有乃大地山河影或言月中蟾桂地影空處水影也月中有兔與蟾蜍何月陰也蟾蜍陽也而與兔並明陰係于陽也。

〔星辰〕說文曰萬物之精上爲列星馬總通歷曰地皇氏定星辰後漢志注曰黃帝分星次凡中外官常明者百二十四可名者三百二十微星萬一千五百二十禮記云帝饗能序星辰蓋地皇氏始定爲星辰黃帝又名之至帝饗而序也。

〔風雷〕橫渠張子曰陰氣凝聚陽在內者不得出則奮擊而爲雷霆陽在外者不得入則周旋不舍而爲風淮南子曰陰陽相薄爲雷激揚爲電。

〔雲雨〕張子曰陽爲陰累則相持爲雨而降陰爲陽得則飄揚爲雲而升春秋題辭曰山氣也觸石而起謂之雲黃氏曰地氣上騰天氣下降故蒸滯而成雨。

〔霜露〕 大戴禮曰陰氣盛則凝而爲霜陽氣勝則散而雨露朱子曰霜只是露結成。

〔雪霧〕 張子曰陰陽和而散則爲霜雪雨露爾雅曰地氣發天不應爲霧論衡曰夏則爲露冬則爲霜溫則爲雨寒則爲雪雨霧凍凝者皆由地發不從天降。

〔霰雹〕 洪範五行傳曰陰陽相脅而雹霰盛陰雨雪凝滯而水寒陽氣薄之不相入則散而爲霰盛陽雨水溫煖而湯熱陰氣脅之不相入則轉而爲雹。

〔虹蜺〕 蔡邕月令章句曰陰陽交接之氣著于形色者雄曰虹雌曰蜺。

〔陰陽〕 春秋內事曰伏羲氏定天地分陰陽。

〔五行〕 史記歷書曰黃帝建立五行起五部應劭曰金木水火土也。

〔晝夜〕 通歷曰地皇氏爰定三辰是分晝夜。

〔刻漏〕 黃帝刻漏水制器以分晝夜周禮有挈壺氏掌之以百刻分晝夜。

〔申子〕 月令章句曰天皇始制干支之名以定歲之所在又云黃帝命大撓探五行之情占斗罡所建作甲乙以名日謂之干干幹也亦曰十母作子丑以名月謂之支支幹也亦曰十二子支幹相配以成六旬。

〔歲〕 黃帝定星歷正閏餘以肇歲事至堯始定四時成歲。

〔閏〕 史記曰黃帝起消息正閏餘則閏蓋餘分之月也黃帝造歷始正之。

〔時節〕書曰堯命羲和定四時春秋內事曰伏羲建分八節以應四時。

〔氣候〕董巴議曰伏羲造八卦作三畫以象二十四氣禮記月令注曰周公作時訓定二十四氣分七十二候蓋一月二氣六候如正月二氣立春雨水六候東風解凍蟄蟲始振魚陟負冰獺祭魚候雁北草木萌動是也餘倣此。

〔十二辰〕事始曰黃帝立子午十二辰以名月又以十二名獸屬之。

〔星官〕後漢志曰軒轅始授河圖闕苞授規日月星辰之象故星官之書自黃帝始至高陽氏乃使南正重司天。

〔分野〕王子年拾遺記曰庖犧視五星之文分野之度。

〔渾儀〕春秋文耀鉤曰唐堯卽位羲和立渾儀劉氏歷曰高陽造渾儀黃帝爲蓋天則渾儀始于高陽氏也至舜則璇璣玉衡以齊七政。

歷易乾鑿度曰歷原名握先注云握先爲歷始之名猶言無前也沿革曰黃帝考定星歷建五行起消息正閏餘謂之調歷後代因之。

〔納音〕鬼谷子作納音其法以干支行數合之以五數除之零數爲納音火一土二水五互用木三金四不移蓋言納者受也音者感動助聲也五行中火本無聲借水擊則火沸金本無聲借火煉則剛水本無聲借土則壅皆發聲也惟金木有自然之聲不擊而響故曰納音。

地理

〔地〕朱子曰。天開於子。又一萬八百年至丑。而地始闢。

〔川嶽〕王子年拾遺記曰。庖犧審地勢以定川嶽。

〔山谷〕遁甲開山記曰。麗山氏產生山谷肇分。自此其始也。

〔石〕物理論。土精爲石。石氣之核也。氣之生石。猶人筋肉之生爪牙也。抱朴子曰。燒泥爲瓦。燔木爲炭。蜂窠爲蠟。水沫爲石。皆柔脆變爲堅剛。

〔池〕黃帝破蚩尤而爲池沼。蓋始于此。

〔泉〕通鑑曰。神農察水泉甘苦。令人知所避就。

〔井〕荊州記曰。神農既育九井。自穿世本曰。黃帝鑿井。聚民爲邑。亦云伯益作井。

〔四方〕太乙金鏡經曰。昔燧人氏仰觀斗極而定方名。東、西、南、北是也。

〔地里〕淮南子曰。禹使大章步東西極。二億二萬三千五百里七十五步。豎亥步南北極。二億三萬三千五百里七十五步。按黃帝遊幸天下。而有記里之車。疑道路之紀以里堠。起軒轅氏也。

〔地圖〕春秋元命苞曰。神農世恠義生白阜。圖地形脈水道。注云。恠義白阜母名。呂東萊曰。輿地有圖古也。成周大司徒掌天下土地之圖。以周知廣輪之數。而職方氏之圖復加詳焉。

〔輿地〕人皇相厥山川。分爲九區。堯五服。甸侯綏要荒。是也。舜分爲十二州。虞書云。肇十有二州。是也。

夏爲九州。書曰九州攸司是也。輿地志曰周成王時周公作輔改禹職方以徐梁合之於青雍分冀州之域爲幽并二州。秦始皇并天下置三十六郡。漢興爲十三州部。唐武德初改郡爲州。貞觀初并省州縣分爲十道。又分爲十五道。宋至道分天下爲十五路。其後又增三路。皇明南京十三省府一百六十羈縻者十一州二百三十四羈縻者四十七縣一千一百一十四衛四百九十三所二千四百一十儀衛司二十九宣慰司十一安撫司二十二招討司一長官司一百七十四四夷來朝貢者一百二十餘國一統之盛超越千古矣。

〔城郭〕管子曰內爲之城外爲之郭。案淮南子鉉作城。吳越春秋曰鉉築城以爲君造郭以守民此城郭之始也。五經異義曰天子之城高九仞。公侯七仞。伯五仞。子男三仞。又公羊傳注曰天子之城千雉。公侯百雉。子男五雉。白虎通曰天子崇城諸侯干城。釋名又云城上垣謂之睥睨亦曰埤亦曰女牆。說文所謂堞者亦女牆也。

〔皇明京城〕南京舊志六朝舊城近覆舟山去秦淮五里至楊吳特改築跨秦淮南北周迴二十五里。洪武初益拓而東盡鍾山之麓周迴九十六里立門十三南曰正陽南之西曰通濟又西曰聚寶西南曰三山曰石城北曰太平北之西曰神策曰金川曰鍾阜東曰朝陽西曰清涼西之北曰定淮曰儀鳳後塞鍾阜儀鳳二門其外城則因山控江周迴一百八十里別爲十六門曰麒麟曰仙鶴曰姚坊曰高橋曰滄波曰雙橋曰夾岡曰上方曰鳳臺曰大駒象曰大安德曰小安德曰江東曰佛寧曰上元曰觀音北京元

志至元四年建大都城洪武初置北平布政司於此永樂七年爲北京十九年營建宮殿成乃拓其城周迴四十里立門九南曰正陽南之左曰崇文右曰宣武北之東曰安定西曰得勝東之北曰東直南曰朝陽西之北曰西直南曰阜成。

〔省〕自漢至唐有尙書省中書省元制天下立十二行中書省故今稱各布政司爲省。

〔寺〕自漢以來九卿所治之府謂之九寺其以官名寺自北齊始也。

〔府〕漢制三公開府故稱三府魏晉以後諸王又稱府唐高祖武德初邊鎮襟帶之地置總管府七年改曰都督府開元三年始改京兆河南曰府。

〔州〕項峻始學篇曰人皇九頭依山川土地之勢財度爲九州沿革曰黃帝分州畫野。

〔縣〕周禮四甸爲縣秦孝公并諸小鄉聚爲縣始皇以郡領縣隋文帝罷郡以縣隸州。

〔郡〕左傳曰上大夫受郡秦始皇并天下始分三十六郡唐高祖乃罷郡置州。

〔邑〕周禮四井爲邑左傳凡邑有宗廟先君之主曰都無曰邑十邑爲都。

〔軍〕周制一萬二千五百人爲軍宋制地要不成州而當津會者則爲軍以縣兼軍使。

〔鎮〕通典曰鎮周後周之通班也隋亦曰鎮唐分上中下三等歷代未聞疑鎮始于宇文周代也宋制民聚不成縣而有稅課者則爲鎮或以官監之。

〔鄉〕周禮五州爲鄉畿內六鄉以爲軍政秦制大率十里一亭十亭一鄉漢以屬縣。

〔關〕易繫辭神農氏重門擊析以待暴客蓋取諸豫周官司徒之有司屬關又有下士二人以譏察非常

〔市〕易繫辭神農氏日中爲市致天下之人聚天下之貨交易而退各得其所蓋取諸噬嗑。

〔坊〕漢洛陽故北宮有九子坊則坊名自漢有也。

〔館驛〕周禮地官凡國之野道十里有廬廬有飲食二十里有宿宿有路室路室有委五十里有市市有候館候館有積漢自鄭莊置驛以迎送賓客故後世亭傳有驛名通典曰唐三十里置一驛其非通途大路則曰館由是通謂之館驛元耶律楚材始定驛令請給官符印給牌劄定令例國朝水驛置船陸驛置馬俱有廩餼。

〔急遞〕筆談曰驛傳舊有馬步急遞三等急遞最遽日行四百里唯軍行用之熙寧中又有金字牌急腳如遞古羽檄也日行五百里國朝置急遞舖。

〔道路〕周禮夏官合方氏掌達天下之道路則道路自古有之而職掌見于周也。

〔封堠〕拾遺錄曰禹治水所穿鑿處皆青泥封記今人聚土爲界乃遺事也。

〔階〕韓詩外傳云鳳蔽日而至黃帝降于東階則階陛之制黃帝爲棟宇則設之也。

〔巷〕姜原生后稷誕寘之隘巷則帝譽時已有名矣。

〔御溝〕宮中之溝旋繞于禁中水通于金水河者曰御溝唐以前有之。

〔金水河〕 帝王闕內置金水河表天河銀漢之義也。自周有之。

〔浮橋〕 春秋後傳曰周赧王五十八年秦始作浮橋于河上按詩大雅云造舟爲梁孫炎曰造舟比舟爲梁也比舟於水加板于上今浮橋也疑周有事則造舟而秦乃繫之。

〔牆〕 淮南子曰舜作屋築牆茨屋令人皆知去巖穴有室家則牆起于此至夏太康始峻宇雕牆矣。
〔藩籬〕 易曰羝羊觸藩疏云藩籬也左傳哀公十二年吳人藩衛人之舍則藩籬之固室家三代之制也。

〔臺榭〕 黃帝內傳帝旣斬蚩尤因立臺榭唐以來砌臺以爲臨觀之景無屋曰臺有屋曰榭。

〔苑囿〕 人皇以九州爲九囿此名囿之始也國朝北京皇城內置西苑中有太液池瓊華島上有廣寒殿京城外置御馬苑大小二十所相距各三四里置南海子養禽獸種蔬果中有海子大小凡三其水汪洋若海以禁城北有海子故別名曰南海子。

〔園圃〕 韓詩外傳曰黃帝時鳳止帝東園莊子曰黃帝之圃此名園圃之始也國朝洪武初置漆園桐園棲園于鍾山之陽內植此木各萬株以備油漆櫟纜用造海運及防倭戰船而省民供焉。

〔地畝〕 通典曰黃帝始立步制畝是田以畝計起自軒轅也唐高祖始定度田之法五尺爲步二百四十步爲畝百畝爲頃。

〔民田〕 文獻通考曰唐始使民得立券自賣其田而田遂爲私田此說亦未深考如蕭何買民田自汚。

貢禹被召之日賣田百畝以供車馬自漢以來民得自買賣田土矣

〔阡陌〕商君傳曰商鞅相秦孝公壞井田開阡陌

時令

〔正月〕夏正建寅易說卦云帝出乎震則正自伏羲始也秦始皇諱政故音從征

〔賀正〕通典曰漢高帝十月定秦遂爲歲首七年長樂宮成制羣臣朝賀儀武帝改用夏正亦在建寅之朔則元日慶賀始于漢高祖也

〔春牛〕前十二月建丑丑爲牛故出土牛以送寒氣且升陽也周制出土牛以示農之早晚如立春在十二月望則策牛人近前示農早也在月晦反正月旦則居中示農平也近正月望則近後示農晚也按牛色以立春日爲法日干爲頭角耳色支爲身色納音爲蹄尾肚色如甲子日立春甲木青色子水黑色甲子屬金白色餘倣此

〔戴燕貼字〕立春日翦綵爲燕簪釵頭以戴之貼宜春字于門觀歐陽公詩云共喜釵頭燕已來王沂公帖云寶字帖宜春則知相傳已久矣

〔幡勝〕立春日後漢立春幡唐賜百官綵勝

〔春盤〕立春日春餅生菜相饋食號春盤唐以前有之

〔春花〕唐中宗令侍臣迎春內出綵花人賜一枝今迎春簪花本此

〔屠蘇〕洪景盧曰元日飲屠蘇酒自小者起相傳已久後漢李膺杜密同繫獄中元日飲酒曰正旦從小起董勛曰俗以少者得歲先飲之老者失歲故後屠蘇草庵名昔有居人於除夕以藥囊浸井中元日取水置酒樽飲不病疫

〔桃符〕山海經曰東海度朔山有大桃樹其卑枝向東北曰鬼門萬鬼出入也有二神曰神荼鬱壘主閥領衆鬼害人者黃帝法而象之立桃板于門上畫二神以禦凶鬼故今桃符書二神字

〔鍾馗〕唐逸史曰武德中終南進士鍾馗落第觸階而死賜綠袍以葬感恩誓除虛耗鬼後明皇夢之召吳道子如夢畫一鍾馗衣藍衫靴一足眇一目腰一笏巾裹而蓬髮垂鬟左手捉一鬼右手剝鬼眼睛擘而啖之故今畫鍾馗像貼于門

〔畫雞〕東方朔占書一日爲雞故今畫雞貼于戶上董勛曰正旦畫雞於門七日貼令於帳爲此也

〔爆竹〕神異經曰西方深山中有人長尺餘犯人則病寒熱名曰山臊人以竹着火中燐有聲而山臊驚憚歲時記曰爆竹燃草起于庭燎

〔花勝〕東方朔占書一日雞二日犬三日猪四日羊五日牛六日馬七日人八日穀其日晴則主物育

陰則災晉賈充夫人剪綵爲花勝或鏤金薄爲人象瑞圖之形是人日起于漢而綵勝起于晉也

〔觀燈〕漢望日祠太乙自昏至明今上元夜遊觀燈是其遺迹唐勅金吾弛禁許三夜士女遊行謂之放夜宋增十七十八爲五夜

〔送窮〕高陽氏子好衣敝食糜晦日巷死世以破衣糜粥棄于巷謂之送窮。

〔中和〕唐德宗勅四序嘉辰歷代增置漢宗上巳晉紀重陽自今以二月一日爲中和節李泌請令文武百僚進農獻穜稑王公戚里上春服士庶以刀尺相遺村社作中和酒祭勾芒祈年穀。

〔寒食〕

舊云寒食禁火起于晉介子推左傳史記並無子推被焚之事按周禮司烜氏仲春以木鐸狗

火禁于國中蓋爲季春將出火也今準節氣寒食是仲春之末清明是季孟之初則禁火乃周制也

〔拜掃〕

古無墓祭之文孔子許望墓以時祭祀漢光武詔諸將出征有經鄉里者有司給少牢令拜掃以爲榮唐明皇因近代寒食上墓相承爲俗詔編入五禮永爲定式漢明帝率公卿朝原陵如元會議後漢亦有上陵儀然上墳之禮疑自是以來民間視上所行因習以爲俗也

〔破散〕

後唐莊宗寒食出祭謂之破散故今人有破散之語

〔風箏〕

漢高祖之征陳稀也韓信謀從中起故作紙鳶放之以量未央宮遠近欲穿地隧入宮中今謂之風箏

〔鞦韆〕

北方山戎寒食爲鞦韆以習輕趨齊桓公伐之始傳中國唐明皇爲樂宮中呼爲半仙之戲一

云正作千秋字爲秋千非也本出自漢中祝壽詞也後世語倒爲秋千耳

〔祓禊〕

三月初巳日爲上巳周禮女巫掌歲時以祓除疾病自魏以後但用三日不用上巳王羲之會

于山陰蘭亭修禊事也唐都人禊飲踏青

〔流杯〕束晳對晉武帝問曲水流事曰周公卜成洛邑因流水以泛酒故逸詩曰羽觴隨流晉以來三月三日曲水流杯卽其始也。

〔糉子〕續齊諧記曰屈原五月五日投汨羅江死楚人哀之每貯米竹筒投祭漢建武中長沙歐迴見一人自稱三閭大夫曰常苦蛟龍所竊更有惠者以棟葉塞筒五綵絲縛之則蛟龍所憚也世以菰葉裹黏米謂之角黍今糉子是也。

〔百索〕風俗通曰五月五日以五綵絲繫臂辟鬼及東漢以朱索桃印文施門戶今百索卽朱索之遺事也蓋始於漢本以飾門戶而今人以約臂相承之誤也。

〔競渡〕屈原投江人以舟楫拯之今競渡是遺迹。

〔遺扇〕唐太宗是日賜長孫無忌楊師道飛帛扇各二枚則端午以扇相遺自太宗始也。

〔懸艾〕師曠占歲病則艾草先生故今採艾懸於戶上以禳毒氣。

〔伏〕伏者何也金氣伏藏之日也四時代謝皆以相生立春木代水水生木立夏火代木木生火立冬水代金金生水立秋金代火金畏火故至庚日必伏庚金也自夏至第三庚爲初伏第四庚爲中伏立秋後初庚爲末伏故謂之三伏秦穆公始爲伏祠。

〔乞巧〕桂陽成武丁有仙道謂弟子曰七月七日織女當渡河暫詣牽牛至今云織女嫁牽牛是夕婦女陳瓜花于几筵言二星神會以綵縷望月穿針以綵縷過者爲得巧之候則穿針乞巧始於漢也。

[孟蘭] 孟蘭經曰目連母亡生餓鬼中佛言須十方衆僧之力七月十五日具百味五果以着盆中供養十方大德後世營僧尼供謂之孟蘭齋

[翫月] 唐明皇宮中翫月歐陽詹序云翫月古也冬則繁霜大寒夏則蒸雲大熱雲蔽月霜侵人俱害翫秋之于時後夏先冬八月于秋季始孟終十五于夜又月之中稽之大道則寒暑均取諸月數則蟾魄圓

[登高] 九月九日九爲陽數而日月並應俗嘉其名以爲宜于長久故燕享高會漢費長房謂桓景作絹囊盛茱萸懸臂登高山飲菊花酒可消家厄故今人登高飲菊花酒帶茱萸囊

[煖爐] 十月一日爲朔朝宋都人出城拜墳如寒食節有司進煖爐炭民間置酒作煖爐會

[賀冬] 地皇氏以十一月爲冬至漢制冬至陽生君子士大夫賀之一云始于晉武帝

[臘] 夏曰嘉平殷曰清祀周曰大蜡漢改爲臘臘者獵也獵取獸以祭先祖臘接也新故交接大祭以報功也冬至後三戌爲臘王者其行之盛日爲祖終日爲臘水始于申盛于子終于午故水行之君以子祖辰臘火始于寅盛于午終于戌故火行之君以午祖戌臘木始于亥盛于卯終于未故木行之君以卯祖未臘金始于巳盛于酉終于丑故金行之君以酉祖丑臘土始于未盛于戌終于辰故土行之君以戌祖辰臘臘祭先祖蜡報百神同日異祭也蜡索也歲十二月合聚萬物而索饗之始于周之蜡云

世傳竈二十四日朝天白一歲終故夜祀之宋都人帖竈馬于竈上以酒糟塗竈門謂之醉司命

周官歲終命方相氏率百隸索屋驅疫以逐之則儺之始也。

〔守歲〕歲終一日爲除日夜爲除夕宋士庶之家圍爐團坐達旦不寢謂之守歲夜祀其先長幼聚飲祝頌而散謂之分歲。

〔月惡〕釋氏智論曰天帝什以大寶鏡照四大神州每月一移察人善惡正、五、九月照南瞻部洲故以此三月省刑修善隋唐以來事佛甚謹著在法律遇此三月則禁刑斷屠後人以其有禁刑之條故士大夫以此三月不上官以其有斷屠之條宮中請俸遇此三月不支羊肉錢其實沿唐朝故事而後人相傳以正五九月爲凶月而忌用。

〔月忌〕俗忌初五十四二十三年年月月在人間世傳指爲五鬼下哭以爲極凶殊不知一月之內此三日微有晦昧無大凶也於此三日只忌中宮檢蓋宅舍安喪柩放頓重物餘無妨也。

人事

〔人〕朱子曰天開于子地闢于丑又一萬八百年至寅而人始生。

〔姓〕通歷記人皇之後有五姓四姓七姓十二姓紀則姓之始疑起于此而帝王世紀至太昊始曰庖犧氏風姓也易是類謀曰黃帝吹律定姓疑姓自太昊始而黃帝定姓者因生賜姓之始也。

〔氏〕左傳曰天子因生以賜姓胙之土而命之氏蓋命氏之原尙矣天皇而降皆稱氏雖盤古之初亦曰氏也。

〔名〕 帝王世紀曰。神農母名女登。左傳曰。太皞以龍紀官。故爲龍師而龍名。則名疑于伏羲氏之前。〔字〕 帝王世紀曰。少皞帝名蟄。字青陽。則自金天氏始爲字也。

〔君臣〕 典略載云。孫瓊表曰。皇羲以來。始有君臣上下之分。由是推之。天皇以降。雖有其分。固亦略矣。至太昊始正之也。

〔皇〕 項淩始學篇曰。天地立有天皇。此稱皇之始也。

〔帝〕 庖羲氏繼天而王。爲百王先帝。出乎震。未有所因。此稱帝之始也。

〔王〕 夏商之前。皆稱帝。自周始。專稱爲王。然夏啓甘誓。稱王曰嗟。仲虺誥湯。曰惟王不適聲色。則夏商雖號帝。亦稱王也。

〔皇帝〕 世皇帝記曰。五帝之初。有天黃皇帝。呂刑曰。皇帝清問下民。蓋周穆王氏以言唐堯也。秦初并天下。李斯采上古位號。號曰皇帝。始皇自以德兼三王。五帝故兼稱之。

〔太上皇〕 丘氏曰。太上皇之稱。始見于秦。然秦以追尊其旣死之父。高祖乃以尊其父之生也。後世遂祖之。以爲極尊之稱。

〔皇太子〕 韓詩外傳曰。后虞以上傳賢。夏商雖傳之子。至周。始見文王世子之制。武王繼之。稱太子。發漢書高祖紀。漢王卽皇帝位。尊太子曰皇太子。漢景帝廢太子榮爲臨江王。後世人主廢太子始此。〔皇后〕 春秋命歷序曰。人皇九人。別長九州。離艮地精。女出爲后。此稱后之始云。初學記曰。夏殷以前。